

沈雲龍編輯

明清史料彙編

第八集

第七冊

文海出版社

有限公司

印行

歸玄恭遺著各序

序一

昔歸高士玄恭先生著有懸弓集二十卷僅見邑志著述目而其書久亡道光中婁東季崧耘先生訪吾邑吳止狷前輩得其家藏玄恭自書稿數十首繼又從先生虞山族孫敏行處得恆軒詩文稿六冊崧耘因與黃琴六趙闇鄉諸君子相與讐校合兩稿釐之得文百有五篇分六卷又詩四十八首別爲一卷附後題曰歸玄恭文鈔洎遭寇亂流傳絕少邑中惟止狷後裔藏有一集光緒丁酉紹訪得之因假錄一通與從前之四處搜羅隨時鈔錄者合虞山本併訂之凡得文一百七十七篇詩一百二十六首釐爲十卷別摹先生小像居首以萬古愁附後題曰歸高士遺集夫先生雅不欲以文人自見後之慕先生者必讀其詩文而後先生磊落不平之概悲歌慷慨之情恍流露於言外當初懸弓集雖未梓行而先生之足增吾邑光者固不獨家學上繼震川卽並世如亭林顧氏亦深相推許時人至有

歸奇顧怪之目今太僕集及亭林氏著作幾遍天下而先生詩文獨沉淪二百餘年僅得虞山張氏刊本兵燹後其書又不易得茲集增原刻十之七八詩則幾及三倍天下至大縱不敢謂先生遺著盡在於斯然就邑中訪之度所存亦無幾矣世有好古如張觀察者爲之表章付梓則紹成數十載搜考之心庶可慰先生於冥漠云光緒三十三年丁未季夏之月邑後學朱紹成謹譔

序二

士君子不幸生當變革而秉大義抱微尚轉喉觸諱難於頌言而僅以文章節義傳已令人歎惋而二百年城郭人民載遭兵燹致殘編闕簡與荒榛積礫俱湮不尤可悲耶光緒之初余輯顧亭林先生詩牋注於贈歸高士哭歸高士送歸高士之淮上諸作知先生與玄恭同時有歸奇顧怪之目而心儀其爲人魏叔子見所爲萬古愁則云呵帝王笞卿相踐藉古之文人恣睢佯狂若屈原李白沈寃醉憤無聊之語而驚怖其人余又深惜高士之吾郡何事書缺有間也癸卯之崑山訪

讀書之士藏書之家詢高士遺著渺不可得聞張惟一言有藏本亟求借讀三四
往來檢閱丁未春詢朱寄梅明經知方繕付梓七月乃持示余誦卷中歷代遺民
錄序玉峯完節錄序虞山先哲圖序小宛齋記照懷亭記萬家基記書先太僕全
集後與陳言夏書諸篇不獨高士之遭際見節概見卽學問淵源性情警歎靡弗
見而至吾郡爲萬年少課子有咸大咸詩序題閩再彭眷西堂詩其歲月皆可考
而見三君子皆吾鄉遺民之卓卓者高士與爲賓主酬唱洵合志同方已與蔣路
然書謂清江浦四面平原得尋丈之阜卽如名山喬嶽而淮河合流洪濤一丈泥
沙五尺黃塵眯目朔風侵肌時或酹酒漂母祠登韓王孫釣臺俯仰憑弔捫腹一
歎是高士居吾鄉久而山陽志乘於亭林一見於王略起田傳再見於張昭力臣
傳於高士無一語及斯又何歟年少隰西草堂集余客彭城時蒐付手民桂履眞
太守復選閩萬二遺民詩彙行海宇而余心一慰而寄梅厚我俾於桑榆荏苒之
年求之再四而未獲覩者一日與校字之役得窺其全豹不尤大慰余心哉於以

幸崑山之遊不虛也至寄梅網羅散佚得文一百七十七篇詩一百二十六首釐爲十卷較之婁東季菰耘原刻多且倍蓰雖高士之文章節義足以自致不朽而蒐擷之勤嘉惠之廣所以盡鄉後進之責者厥功非細夫何待言光緒三十三年八月之望山陽後學徐嘉序

序三

歸高士恆軒先生與亭林顧氏同里齊名世並稱曰歸顧然亭林著述宏富名滿寰區國史儒林褒然居首百世瞻仰不啻泰山北斗矣而先生文章氣節不讓亭林徒以遯跡韜光聲華久秘故世不盡知幸所交遊皆一時賢豪隱逸其姓名行事時時見於諸家之著作不致湮沒無聞顧其詩文散佚可得而覩者蓋已鮮矣嗚呼開國之初賢才輩出桴亭陸子與亭林先生後先從祀孔子廟庭恆軒之於亭林猶確菴之於桴亭也夫桴亭亭林皆不朽矣而知確菴與恆軒者有幾人哉宜乎景慕其人者亟思有以傳之也曩者婁東之士業有陸陳二先生詩文合刻

之集吾崑獨無人焉搜羅先生之詩若文此吾黨之耻也今朱君寄梅出其所編歸高士集十卷示余屬爲之序余不能詩文豈能序先生之集哉顧幸先生之詩文得賴朱君撮拾之力以永其傳此吾人之所深慰然不亟付梓雖傳猶不廣也勉盡心力以授手民則又不能無望於吾黨之士矣宣統己酉紀元邑後學王德森謹序

序四

自來極盛之下難爲繼前明歸震川先生其文如日星之在天河嶽之在地卓然稱一代大儒其曾孫恆軒先生有懸弓集三十卷久已失傳太倉季君菰耘蒐輯其文得若干篇名曰恆軒先生遺文錄以示余余受而讀之愛其根柢深厚波瀾老成而一種傲岸自異確乎不拔之慨恍然於字句之外如見其人文中如阮貞孝傳規時立論洵足羽翼太僕之文而致季滄葦侍御一書亦與妄庸巨子之詆排氣節相似蓋惟其胸有千古特立不撓故目光如炬行氣如虹而不爲俗屈也

曩者歸氏後人以太僕大全集板片歸余余諾而度之今春方擬并恆軒先生遺文梓以附後適菰耘居停閭鄉趙孝廉復從里中歸氏訪得玄恭詩文六冊雖非懸弓原帙已屬全稿菰耘與閭鄉復彙兩稿慎爲選擇取其精粹無偏駁者得文六卷詩一卷畀余付刊洵藝林快事也於此見明德達人世濟其美而文之至者必傳是故文章之顯晦有時而如二君搜往闡幽之勤其功良非細已梓竟遂書之爲序道光十七年丁酉四月中浣虞山後學張大鏞謹撰

序五

世之善爲文者必有精神意氣行乎其間故文無論工拙其人已往而讀其文穆然如將見其人雖坦直率易無害其爲工讀其文茫然不知其爲何如人雖瑯瑒靡曼不能揜其拙何者精神意氣之存焉否也玄恭先生當新故乘除之際家憂國恤甌患迭膺竄身刀途血路之中削迹荒江老屋之下託於遺民詭爲頭陀不死不生亦狂亦狷顧時時爲文而精神意氣乃畢露於文雖然玄恭之文亦幾晦

矣卽其生平節衣縮食丐募四方刻其先太僕公遺集僅而得就必無餘貲自刻其文又遭時多難轉喉觸諱亦必自闕其文不輕傳寫二百年來好古之士但從郡邑志中見懸弓集三十卷之目而文卒不得見也余友婁東季菴雲曩於崑山吳氏獲見玄恭手藁輒錄置篋衍文止數十首余因助之徧訪邑中藏書家乃得玄恭族孫子瑾孝廉所藏詩若文共六冊遂假之歸與菴雲共讀其文不立間架不事塗澤浩浩落落蒼莽莽或謂其與太僕家法絕異余曰此正所以爲玄恭也今夫山西北之雄厚不同東南之明秀因乎地水春夏之冲融不同秋冬之澌淨視乎時唯其不同而巖壑乃各擅其自有之奇然則玄恭之於太僕地與時何如哉而強欲其文之同則精神意氣必不存乃今讀其文而人人意中有一鬚眉挺然傲岸自若之歸玄恭也誠無愧於善爲文已鄉先達張鹿樵觀察素喜表章遺佚菴雲排比成卷介黃丈琴六質諸觀察觀察知天下欲見玄恭文而不得者久矣又太僕大全集鏤板適藏觀察所於是登諸梨棗俾傳大全集以行是則玄

恭之文之不終於晦亦其精神意氣之有以自致之歟至其詩豪宕感激非摘章續句所能彷彿故與文筆無異不別論云道光十七年丁酉春三月常熟趙允懷

序

序六

昔先府君喜菟訪先哲遺文嘗語錫疇云崑山歸氏自太僕後代以文行著季思文休玄恭諸先生悉有撰述雖不大顯於世然世必有藏弄之者小子識之癸未朋試信宿吳銀帆先生齋中時先生方修邑志因叩以舊志載歸氏諸集可得否先生因出玄恭自書文稿一冊見示僅數十首云此外訪之不得矣攜歸呈諸府君府君讀之喜命小子編次成帙既於友人處見有玄恭文卽鈔入之未暇持擇也曩者客虞山間張觀察鹿樵先生喜表章先哲且太僕大全集版藏其家因屬黃丈琴六貽之去冬晤丈云觀察已許開雕屬爲參校余終以未窺全豹爲嘆今年春館常熟趙孝廉閭鄉家塾閭鄉助余接訪於邑中歸氏假得恆軒詩文稿六

冊爲玄恭族孫敏行手錄覈諸余所錄者互有異同而多逾倍蓰遂彙兩本偕閭鄉愼爲詮次鈔成六卷并詩一卷校讎已畢謹序之曰玄恭先生生百六之際廣柳屢迎野葛時餉有爲世人所不堪者而獨立不懼志節皎然所謂不爲威惕不爲利疚時形於友朋往復間向使膺一命之寄其臨大節而不奪可知乃窮困抑塞歌哭無端卒成詞章之士以沒世非先生之志也然百世而下讀其文亦可想見其心矣嗟乎自來獨行之士雅不欲以文采自見而其名亦不待詩文而後傳然苟任其銷蝕於鼠穴蟬窟之中使不朽之精魂孤行於太空而世莫之覩此亦稽古之士之所傷也先生之文沈埋幾二百年一朝復顯而又遇觀察表章俾與太僕集並垂不朽謂非藝林一快事歟吾知季思文休兩先生之詩文雖流傳絕少亦不終晦也惟是府君遽棄不肖忽忽已屆大祥銀帆先生亦久歸道山俱不獲見是刻之成不禁悲愴欲絕已道光十七年歲次丁酉孟夏後學太倉季錫疇

識



題辭

清初文字獄頻興正氣難伸冷變冰歸子半生桑海淚卅年熱度鬱逾升

明清易代間凡

抗志不屈之士其遺著五二百多年恐觸忌諱無敢梓行者洎清運垂衰始稍稍出現數種

弇州淞水師兼友陸顧二賢兩廡登遺著曾經收四庫憐君殘帙久銷沈

明季理學名儒

太倉陸桴亭先生玄恭顧師事之嘗因玄恭以識亭林所著思辨錄曾登四庫光緒紀元從祀文廟生平叢著經郡之唐氏陸續搜輯己亥年刊於京師名陸子遺

書其詩文集申頗有贈贈玄恭之作

內狷外狂本性天國憂家難急相煎隰西白奪淮徐契非士非僧共遜禪

邳上遺民萬壽

祺號年少著有隰西草堂集閩爾梅自稱白查山人玄恭與之友善三子各有僧號非士非僧閩詩句也

桐城文派東南布逆泝淵源自震川有道曾孫誠不愧縣縣三世永家傳

芸士舊藏稿豈全紫陽補輯未遑鐫而今遺著重新訂不藉棗梨板製鈔

道光間太倉季

菴耘既刻玄恭文鈔復從海甯楊芸士明經處見藏有舊鈔本借錄之埃他日設法補刊光緒季年上海國學保存會歸玄恭文續鈔之刊卽此本也餘詳跋語

不佞譾陋何敢敘先哲遺著抑朱輯稿中先後諸家序文已羅附卷末更奚用

序至韻語題辭古無此例漫效可嗤重訂付諸鉛印小言聊綴祇補拙跋之疏
耳崑山徐崇恩慧乘甫識於聊園

事略

歸莊字玄恭昌世子爲諸生時博涉羣書落紙數千言不止善書工墨竹性嗜酒攜酒應院試且飲且書日未哺成七義分隸篆眞草書五經文字御史怪而黜之惜其才旋復焉順治乙酉縣丞閻茂才攝令事下薙髮令士民不從譟於縣繫茂才莊白衆殺之遂嬰城守事定後究前事莊亡命薙髮僧裝稱普明頭陀隱居鄉僻後乃廬金潼里先墓側生平最善顧炎武以博雅獨行相推許而俱不諧於俗里中有歸奇顧怪之目

錄同治蘇州府志
引道光崑新志

歸莊字玄恭昌世子少通五經工諸體書性豪放善飲酒酣落筆輒數千言不能止爲諸生應院試酒瓶纍纍筆墨間日未哺成七義分眞草隸篆書五經文字提學御史元煒怪而黜之惜其才旋復焉乙酉六月邑人將舉兵先殺縣丞閻茂才其議實倡於莊已而亡命謝儒冠往來湖山間遠近談忠義者以莊爲歸而莊能揆是非辨眞妄未嘗輕以身殉卒免於難莊性好奇爲諸生時忽請於學使者改

名祚明自後或稱歸藏或稱歸乎來其字或稱懸弓或稱園公既薤髮僧裝稱普明頭陀亦稱鑿鑿鉅山人生平最善顧炎武以博雅獨行相推許而俱不諧於俗里中有歸奇顧怪之目詩歌古文墨竹無不工自謂狂草近代無敵以酒至者長箋短幅揮灑不倦獨不喜應貴介南渡錢塘北涉江淮必奉祖先像行遇令節諱日采藻束芻以祭晚年不能自給寄食僧舍顧非素交雖厚贈弗納卒年六十一兄子玠字安蜀能文有守終於里

選乾隆崑山新志
本葉均補傳

先生名莊字玄恭號恆軒徵士昌世子博覽羣書尤精司馬兵法既遭國難家亦破亡棄諸生浪蹟江湖與顧亭林炎武齊名詩文豪邁善書工畫竹邑中多故舊

恆流連浹歲卒年六十一葬金潼里祖塋

程祖慶原案云先生自乙卯後更名祚明亦號普明頭陀嘗僧裝亡命後乃廬金潼里先墓側生平最善顧亭林先生以博雅獨行相推許而俱不諧於俗有歸奇顧怪之稱康熙癸丑先生卒時亭林在山左設祭於章邱桑家莊有哭歸

高士詩四首其次章云峻節冠吾儕危言驚世俗常爲扣角歌不作窮途哭生

耽一壺酒歿無半間屋惟存孤竹心庶比黔婁躅先生志節可概見矣

練川人畫像

傳小

歸莊字玄恭昌世子爲諸生博涉羣書落紙數千言不止性嗜酒攜酒應院試且飲且試日未哺成七義分隸篆眞草書五經文字御史亓煒怪而黜之惜其才旋復焉順治乙酉六月縣丞閻茂才攝令事下薙髮令士民不從噪於縣繫茂才莊白衆殺之遂嬰城守事定新令究前事莊亡命薙髮僧裝稱普明頭陀隱居鄉僻後乃廬金潼里先墓側生平最善顧炎武以博雅獨行相推許而俱不諧於俗里有歸奇顧怪之目詩古文墨竹無不工尤善書壯歲所作行草直逼兩晉以酒至者長牋短幅揮灑不倦往來江淮浙水間輒奉先像以行遇令節諱日采藻束芻以祭晚年校正曾祖震川文集付梓傳世折衷諸名家持擇頗精卒年六十一

兄子玠字安蜀磊落能文不屑爲投時技以歲貢終附採崑新合志

補錄閩古古集

鑿鑿歌爲崑山歸玄恭作

閩爾梅

鑿鑿鉞寒金粟縷彫爲龍豹啼風雨銀鯨製鞘綠松鐔涼夜啾啾作鬼語雲內青
鎖錘萬折鋒如破冰瑩如雪蒲元淬之蜀江濤歐冶鎔之嬰孩血挂在壁間吐瑤
華茅屋深宵閃明月余問主人欲何爲虬髯直豎雙瞳裂男兒不能抒國難老死
蓬蒿心慟絕佩茲神福出家門或走單于或走越四海茫茫無漢土市僧傭奴炫
圭組不讀書人盜科名丈夫豈甘羣輩侮督亢圖中七首藏專諸行炙試魚腸或
從介子斬樓蘭或許朱雲借上方抱甕灌園徒自苦髡笄羞與豺狼伍木難火齊
空塵蠹短褐不完乞誰補伏波銅柱插南溟嫖姚功勒祁連銘一生談劍不封侯
牀頭笑煞陰符經